

An ein Oster Tag war ein grosse Schaar  
Männer in einer Kirchen versamblet/ vnd  
sie wurden einig/ das frölich Oster Gesang/  
Christ ist erstanden/ &c. zu singen/ wolt aber  
Keiner den Anfang machen/ da sprach ein  
fürnehmer Redner vnter ihnen/ der jenig/  
so selbst in seinem Hauß/ vnd nicht das  
Weib Meister wär/ solt das Gesang anfan-  
gen; Da aber Niemand es anfangen wolt/  
sprach er: das Gott erbarm/ daß doch das  
Männlich Gemüch so gar erkaltet/ vnd vnter  
allen Niemand vorhanden/ der die Meister-  
schafft in seinem Hauß erhalten thut; End-  
lichen kam Einer herfür/ welchen die Sach-  
verschmähet/ der fieng das Gesang an/ vnd  
sie sungen ihm Alle nach/ vnd als das Ge-  
sang vollendet/ führeten diese Männer/ ih-  
ren Vorsinger/ den frechen Gesellen/ als ei-  
nen sonderbarn Beschirmer der Männlichen  
Ehr/ zu einem stattlichen Gast-Mahl/ vnd  
thaten ihm viel vnd grosse hohe Ehr an.

Wie billich/ dann er der Männer Reputa-  
tion dapffer erhalten hat.

Gerad